



NJEMAČKA POLICIJA SE ZAHVALILA SIPA-I

BJEGUNCA UHAPSILI U SARAJEVU

Pripadnici Državne agencije za istrage i zaštitu BiH (SIPA), na osnovu informacija koje su dobili od njemačke kriminalističke policije, u Sarajevu su uhapsili libanonskog državljanina Bilala Chahroura (32), za kojim je bila raspisana međunarodna potjernica, nakon što je izveo spektakularan bijeg iz zatvora u Bochumu.

Kako je jučer saopćeno iz ove policijske agencije, pripadnici SIPA-e su, u okviru svojih nadležnosti brzo reagirali, te locirali osumnjičenog, nakon čega je predat Sudu BiH radi ekstradicije, te konačno izručen



CHAHROUR: Vraćen u Njemačku

njemačkim nadležnim organima. Akcija hapšenja izvedena je još u oktobru prošle godine, ali su se iz SIPA-e o slučaju oglasili tek jučer, nakon što je njemačka policija uputila zahvalnicu direktoru SIPA-e u kojoj je navedeno da je ovo izuzetan primjer međunarodne policijske saradnje.

- Ovim srdačno zahvaljujem na brzom i profesionalnom podršci, te izuzetnom zalaganju pripadnika Vašeg državnog tijela - navedeno je, između ostalog, u zahvalnici.

Kako saznajemo, Chahrour je jedan od rijetkih kriminalaca koji je uspio pobjeći iz

bohumskog zatvora, a prema pisanjima tamošnjih medija, pobjegao je tako što se popeo na svjetlarnik na krovu zgrade zatvora, a zatim sa šest metara visine skočio na ravni krov susjedne zgrade. Odatle je ponovo skočio sa oko pet metara visine na pločnik i pobjegao u nepoznatom pravcu. Iako je odmah pokrenuta opsežna potraga, Charour je pet godina bježao od zakona, dok nije otkriven i uhapšen u našoj zemlji. Smatran je za opasnog i potencijalno nasilnog bjegunca, a uhapšen je zbog oružane pljačke u supermarketu u Dortmundu.

M. M.